

## LA FERVOJA MUZEO – STACIDOMO CAMPO MARZIO

DUM LA JAROJ 1901 kaj 1906, samtempe al konstruado de la trafiklinio *Transalpina* (germane, *Wocheinerbahn*), por realigi la duan fervojan kunligon inter la triesta haveno kaj aŭstro-hungara imperio, oni starigis novan urban stacidomon.

Tiel naskiĝis eleganta kaj impona konstruaĵo, inaŭgurita la 19<sup>an</sup> de julio 1906 samtempe al *Transalpina* (*Trieste-Gorizia-Piedicolle-Jesenice-Rosenbach*). Poste ĝi fariĝis startpunkto ankaŭ por la linioj *Istriana* (*Trieste-Erpelle-Pola*), aktiva ekde la jaro 1887, kaj *Parenzana* (*Trieste-Buie-Parenzo*), ekde 1902.

Oni potencigis ĝin ankaŭ por vartrajnoj venintaj de la malnova haveno, pere de kunligo al la Suda Stacidomo (la nun ekzistanta) trans *rivabahn* aŭ marborda linio.

Post la jaro 1918, la stacidomo estis plene utiligata ĝis 1935, kiam oni nuligis la *Parenzana*-n. Dum la dua



mondmilito oni forprenis la kovritan parton de la relreto pro militaj uzoj kaj, bedaŭrinde, neniam eblis restarigi ĝin.



Sekve de la militsortoj, la trafiklinioj *Transalpina* kaj *Istriana* estis destinitaj al la tiama Jugoslavio, kaj *Trieste Campo Marzio* dekadencis kaj servis nur por iri ĝis *Draga Sant'Elia* (landlimo kun la najbaro). Tiu servo definitive ĉesis en 1958 kaj la stacidomo estis utiligata nur por bezonoj de la nova haveno.

La ĉefa konstruaĵo, Muzea sidejo ekde la 8<sup>a</sup> de marto 1984, danke al agado de Libertempa Organizo Fervoja, estis renovigita de la Itala Ŝtata Fervojo: mankas nur la vitra-metala tegmento por protekti la maŝinojn. Volontuloj zorgeme flegas la antikvajn ekipaĵojn, lokomotivojn, dokumentojn, fotojn kaj

aliajn objektojn; eblas ankaŭ konsulti la bibliotekon, riĉan je ĉirkaŭ 1 500 libroj, dediĉitaj al transporta historio. La ekspozicio konsistas el kvar sekcioj: historio, konstrulaboroj, modeloj, elektraj instalaĵoj, kaj ankaŭ pri la tramista servo en Triesto kaj ĝia regiono, kaj Istrio.

